



欽定四庫全書

史部
政書類存目一二

133
447

12
130
47

冊七



1152
1380
47



法凡為圖十有六為說十有九皆一一得諸試驗

故一一可見諸施行乃知前明無錫人以活字印

太平御覽自隆慶元年至五年僅得十之一二者

案事見黃正色太平御覽序由於不得其法此亦足見

聖朝制器利用事事皆超前代也

右政書類考工之屬二部三十五卷皆文淵閣著錄

欽定四庫全書總目卷八十二

番禺張兆章初校
番禺劉昌齡覆校

欽定四庫全書總目卷八十三

史部三十九

政書類存目一

杜氏通典詳節四十二卷

浙江巡撫
採進本

不知何人所編驗其版式猶宋時麻沙刻本所列
引用諸儒姓氏止於呂祖謙陳傅良葉適三人皆
註有文集見行字則南宋人所為也於杜氏通典
八門內汰其兵制一門於禮制門內又刪去喪服
之制故六朝諸儒議禮之文藉通典以傳者多不

見錄又其去取多不可解如通典卷一載後漢田制凡列荀悅崔寔仲長統三人之說而是書獨存荀悅蓋力求簡約而略無義例者也

元典章前集六十卷附新集

無卷數
內府藏本

不著撰人名氏前集載世祖卽位至延祐七年英宗初政其綱凡十曰詔令曰聖政曰朝綱曰臺綱曰吏部曰戶部曰禮部曰兵部曰刑部曰工部其目凡三百七十有三每目之中又各分條格新集體例略倣前集皆續載英宗至治元二年事不分

卷數似猶未竟之本也此書始末元史不載惟載至治二年金帶御史李端言世祖以來所定制度宜著爲令使吏不得爲姦治獄有所遵守英宗從之書成名曰大元通制頒行天下凡二千五百三十九條計其時代正與此書相同而二千五百三十九條之數則與此書不相應卷首所載中書省劄亦不相合蓋各爲一編非通制也考元史以八月成書諸志皆潦草殊甚不足徵一代之法制而元經世大典又久已散佚其散見永樂大典者顛

倒割裂不可重編遂使百年掌故無成書之可考
此書於當年法令分門臚載採掇頗詳固宜存備
一朝之故事然所載皆案牘之文兼雜方言俗語
浮詞妨要者十之七八又體例皆亂漫無端緒觀
省劄中有置簿編寫之語知此乃吏胥鈔記之條
格不足以資考證故初擬繕錄而終存其目焉

明祖訓一卷

浙江巡撫
採進本

明洪武二年命中書編次其目十有三一祖訓首
章一持守一嚴祭祀一謹出入一慎國政一禮儀

一法律一內令一內官一職制一兵衛一營繕一
供用至六年五月書成太祖自爲序復命宋濂序
之此本佚濂序惟太祖之序載篇首序稱開導後
人立爲家法大書揭於西廡朝夕親覽以求至當
首尾六年凡七謄錄橐至今方定命翰林編輯成書
禮部刊印云云然則諸詞臣僅繕錄排纂而已其
文詞悉太祖御撰也其中多言親藩體制大抵懲
前代之失欲兼用封建郡縣以相牽制故親王與
方鎮各掌兵王不得預民事官吏亦不得預王府

事尤諄諄以姦臣壅蔽離間爲慮所以防之者甚至如云若大臣行姦不令王見天子私下傳致其罪而遇不幸者其長史司併護衛移文五軍都督府索取姦臣族滅其家又云如朝無正臣內有姦惡則親王訓兵待命或領正兵討平然則靖難之事肇釁於此高煦宸濠遂接踵效尤是亦矯枉過直作法於涼之弊矣皇甫錄明記略云祖訓所以教戒後世者甚備獨無委任閹人之禁世以爲怪或云本有此條因版在司禮監削去耳然永樂大

典所載亦與此本相同則似非後來削去錄所云云蓋以意揣之也

明朝典彙二百卷

浙江巡撫探進本

明徐學聚撰學聚有歷朝瑣鑑已著錄是書採錄明代典故自洪武訖隆慶分類編纂上自實錄下訖稗乘條分類萃凡二百門卷一至三十三卷爲朝政大端三十四卷以下則以六部分標記載頗爲繁富然分隸不無錯雜如明制六部與卿寺院監不相統攝此書則以宗人府都察院以下皆歸

入吏部又如廟號尊諡陵寢巡幸郊祀祈禱祠醮
皆禮部職也較閱兵部職也耕蠶莊田勲戚田土
皆戶部職也此書則一切歸入朝政大端中於體
例皆為未協又採摭浩博而皆不著其出典亦未
免無徵不信李燾續通鑑長編凡所引證必著書
名不如是之莫知所本也

經世實用編二十八卷

江蘇周厚培家藏本

明馮應京撰應京有六家詩名物疏已著錄是編
乃萬歷甲辰應京下詔獄時所成分乾元亨利貞

五集乾集十卷元集二卷亨集二卷利集四卷貞
集九卷首載明太祖心法祖訓以迄取士任官重
農經武禮樂射御書數而終之以諸儒語錄正學
考大都稟祖訓為律令而以歷朝沿革附之其用
意不無可取至以乾元亨利貞分集取羨里演易
之義則未免於僭矣

明典章

無卷數 浙江巡撫採進本

不著撰人名氏輯太祖吳元年以後世宗嘉靖十
五年以前朝廷制誥典制大抵從實錄鈔出編次

殊無體例

會典鈔略

無卷數
內府藏本

不著編輯者名氏前有題詞稱會典一書卷逾二百鬻之價多攜之囊重士有自操槩以至歷官不獲一睹者其在里巷齊民尤可知已但全書紀載雖夥其當訓行者概有大略因手鈔略節約十餘帙間附註通紀一二事以備參考云云是其書在陳建通紀之後矣

右政書類通制之屬七部三百三十一卷

內二部
無卷數皆

附存目

別本漢舊儀二卷

兩江總督
採進本

舊本題漢議郎東海衛宏敬仲撰宏所撰漢官舊儀已於永樂大典內繕出著錄語詳本條下此本書名與後漢書宏本傳合而四篇之數仍不合併與書錄解題三卷之數亦不相應其中多引胡廣語廣為安帝時人宏為議郎則在光武帝時先後相隔六十餘年不應宏書之內先有廣名又時時稱衛宏曰亦必非宏自著書之體其註中并引及

周禮註疏註出鄭康成疏出唐賈公彥宏益不得見之矣蓋原書久佚後人從漢書註中摘錄而成觀其中竹宮去壇三里一句前後兩見則爲雜鈔致複無疑矣今宋代舊本猶存永樂大典中業已校錄刊刻重顯於世此後人哀集之本固可置而不論矣

貢舉敘略一卷

編修程晉芳家藏本

舊本題宋陳彭年撰載曹溶學海類編中實冊府元龜貢舉一門之總序以彭年爲作序五人之一

遂題彭年之名然原本不言此序出彭年也

通祀輯略三卷

兩淮鹽政採進本

不著撰人名氏載歷代崇祀孔廟禮儀起魯哀公迄宋咸淳三年疑爲元人作也凡三卷上卷分諡號廟祀殿額坐像冕服封爵位序配享八門中卷分從祀鄉賢二門下卷分釋奠樂章曲阜廟幸學謁廟告遷奉安五門

明堂或問一卷

左都御史張若淮家藏本

明世宗肅皇帝御撰嘉靖十七年致仕同知豐坊

疏請復古禮建明堂加興獻帝廟號稱宗以配上
帝詔下禮部會議尙書嚴嵩等皆以明堂爲應建
而於稱宗配享二事則依違其詞戶部侍郎唐胄
抗疏言宜以太宗配享帝怒下胄獄嵩乃再會廷
臣議請以興獻帝稱宗配食帝以疏不言祔廟畱
中不下復設爲臣下問荅之詞作或問一篇大略
言文皇遠祖不應嚴父之義宜以父配稱宗雖無
定說尊親崇上義所當行旣稱宗則當祔廟豈有
太廟中四親不具之禮是年九月遂尊興獻帝爲

睿宗祔太廟又卽元極寶殿爲明堂大享上帝以
睿宗配皆如帝旨此本前有帝所自作小序後以
配享詔書一通附之

正孔子祀典說一卷

左都御史張若淮家藏本

明世宗肅皇帝御撰嘉靖九年大學士張璁請正
先師祀典帝因言聖人尊天與尊親同今全用祀
天儀非正禮謚號章服悉宜改正璁遂請改孔子
稱先師不稱王用木主不用塑像籩豆用十樂用
六佾配位宜削公侯伯之號止稱先賢先儒帝命

禮部集議編修徐階疏陳不可帝怒謫階官因親製此文宣付史館大略謂孔子以魯僭王為非甯冒自僭天子之禮尋以羣臣爭執者眾復降諭曉示命禮部與祀典說通行刊布於是其議遂定案明史禮志尚有帝所製正孔子祀典申記一篇此本所附敕諭中亦有朕著說記之語而書中有說無記疑為傳寫者所脫也

存心錄十卷

浙江朱彝尊家曝書亭藏本

不著撰人名氏皆記明初壇廟祭祀之制而附以

災祥物異其前有序稱臣等承命作此錄以堅誠敬之心是奉敕所撰而其文多殘損不完考明史藝文志有吳沈等編集存心錄十八卷精誠錄三卷皆在故事類中吳沈者蘭溪人元國子博士師道子洪武時官東閣大學士嘗著辨言孔子封王之非禮後嘉靖中更定祀典實祖其說則其人嫻於說禮可知而此書內所載禮節皆洪武三年以前之事則藝文志所謂存心錄者即此書也惟此本止十卷與十八卷之數不合檢核書首有私印

一其文曰尚寶少卿袁氏忠徹印蓋猶明初舊本
尚無脫佚又黃佐南離志載嘉靖間存心錄版存
者五十八面闕者三面所列亦止十卷與此本同
是史志誤衍一八字也

日本東夷朝貢考一卷

浙江范懋柱家
天一閣藏本

明張迪撰迪字文海華亭人所輯日本朝貢事頗
多闕略如永樂二年封其國山爲壽安鎮國之山
兩遣使來貢等事悉佚不載書末全錄宋元二史
外國列傳以足其卷似是議日本封貢時偶爲考

紀云

臨雍錄一卷

浙江范懋柱家
天一閣藏本

明費闇撰闇字廷言丹徒人成化己丑進士官至
禮部侍郎宏治元年三月孝宗舉行臨雍釋奠禮
闇時爲祭酒因錄其禮儀奏議及官禮部時乃編
次成書付淮安知府徐鏞刻之至宏治九年林瀚
兼祭酒事又刻於國子監其書全錄吏牘之文無
一字之刪潤詞不雅馴不足以稱崇儒大典考郊
外農談曰鳳翔之麟游有虎臣者慷慨有節氣成

化未貢入大學適聞萬歲山架樓棚以備登眺臣
上疏極諫憲廟奇之祭酒費閭不知也懼其買禍
乃會六堂鳴鼓聲罪銀鎗鎖之以待俄官校宣臣
至左順門中官傳溫旨勞之曰爾言是也樓棚好
拆卸矣命吏部予臣七品正官閭大慚云云則閭
爲祭酒本不愜於公論其著作益可知矣

大禮集議五卷

浙江范懋柱家
天一閣藏本

明席書編書遂甯人宏治庚戌進士官至武英殿
大學士諡文襄事蹟具明史本傳嘉靖初書爲南

京兵部侍郎大禮議起書揣知帝意方向張聰在
萼乃上疏力主其說帝大喜時汪俊代毛澄爲禮
部尙書猶堅執如澄議及俊以力爭建廟去位帝
特旨用書代之此編卽其爲禮部尙書時所編刻
以進者也初侍讀學士方獻夫請刊大禮奏議二
卷後吏部侍郎胡世甯復續增一卷至廟議已定
書乃取原編定爲奏議一卷會議一卷續議一卷
復增廟議一卷末又附諸臣私議一卷私議者議
而未奏者也然皆不外聰萼等附合時局之說耳

科場條貫一卷 江蘇巡撫採進本

明陸深撰深有南巡日錄已著錄是書紀洪武至

嘉靖間科舉條式於前後損益之制臚列頗詳

保和冠服圖一卷 浙江范懋柱家天一閣藏本

明張璁撰璁有諭對錄已著錄是書作於嘉靖七

年在璁未更名以前故仍題原名先是世宗命璁

製燕弁冠服為燕居所御又製忠靜冠服以錫有

位會光澤王請宗室冠服式命以燕弁為準定為

此圖而敕璁為之說前有諭旨及璁序其冠親王

九祿世子八祿郡王七祿服用青身青緣前後方

龍補襯用深衣玉色帶用青表綠裏綠緣履用阜

綠結白鞵其鎮國將軍至奉國中尉左右長史至

伴讀咸從忠靜冠服以品官之制服之其儀賓則

不預焉名曰保和言各得其分則和也其冠圖為

前後左右四面服圖為前後二面較三禮諸圖繪

一面者為詳可為繪圖之式云

太廟敕議一卷 左都御史張若淮家藏本

明嘉靖中禮部頒行本也成祖既遷都北平而南

京太廟仍舊不廢至嘉靖十三年南京太廟災禮部尚書湛若水疏請重建世宗敕羣臣集議尚書夏言及大學士張孚敬等會疏稱國不當有二廟請以南京太廟香火歸併奉先殿其太廟故址仿古壇墀遺意高築牆垣令所司謹其啓閉帝從其議言因取所奉敕旨及會議題彙彙成此帙奏請刊行

改元考一卷

兩江總督採進本

明宗室朱常泗撰前有自序載嘉靖壬午魯國常

泗識考明史諸王世表不載其名蓋魯荒王檀之元孫而懷王常澁之從兄弟也此書專考歷代年號起漢建元迄明嘉靖自正統以及僭偽偏安無不具載然其中譌謬之處不一而足如十六國春秋載蜀李雄以晉永興元年僭稱成都王改元建興次年即帝位改元晏平國號大成乃華陽國志偶譌大成爲大武而晉書載記遂刪晏平及國號四字直曰改元大武此書竟以大武與晏平竝列殊爲疎舛又後秦姚萇初稱秦王改元白雀三年

僭帝號又改建初建初七年薨卒子興立即改爲
皇初此書於白雀後誤增皇初而建初之號又誤
移之姚興之下又西秦乞伏乾歸僭號河南王改
元太初後降於姚興尋又倍之自稱秦王改元更
始此書於太初之後更始之前誤增一宏始殊不
知宏始乃姚興之年號非乾歸之年號也因乾歸
降興時史冊用興年紀事而遂屬之乾歸鹵莽甚
矣其他輾轉譌謬如於乞伏熾磐則脫永康之號
而於慕容皝則多永壽之號大抵沿襲別本之譌

而失於稽考至於明太祖以下至世宗皆直書名
某而不避其諱常泗原本未必敢於如是或傳寫
者所追加歟

重輯祖陵紀略二卷

兩江總督
採進本

明宗室朱自新撰祖陵者明高帝祖熙祖陵也在
泗上初高帝未知熙祖葬所有朱貴者繪圖以獻
即命貴充奉祀其八世孫邦翰因輯祖陵紀略一
書述修繕祭祀之事嘉靖癸丑自新又重輯是編
自新邦翰孫也

諭法通考十八卷

浙江朱彝尊家
曝書亭藏本

明王圻撰圻有東吳水利考已著錄圻著續文獻通考於禮考之末增諡法一目補馬端臨之闕然於明代諡典猶未之及此書所載上考列朝下至萬歷自君后妃主王公卿相以逮百官至於聖賢隱逸旁及異端宦寺篡逆之黨凡有諡者皆備書以資考證其卷首冠以總紀釋義二目猶續通考之例又所以自補其闕也有趙可懷序稱就續通考中抽出諡法一種另梓殆未詳閱其書歟

太常總覽

無卷數 兩淮
馬裕家藏本

明金贊仁撰贊仁嘉靖初道士以齋醮有寵官太常寺少卿是書嘗經奏進於典禮分別圖註條理頗詳然大抵其時之黷祀也

明臣諡類鈔一卷

內府
藏本

明鄭汝璧撰汝璧有明帝后紀略已著錄是書專載明代臣僚之得諡者始自劉基終於李珍凡六百六十一人各以諡法區分門類而不敘年代末附蘇祿朝鮮淳泥日本諸國王凡得諡者咸編入

焉其不載親藩者則以帝后紀略已附藩封一門故也汝璧此書與功臣封爵考乃其官禮部儀制司及吏部驗封司時所作皆有案牘可考故紀載較他家爲確云

明貢舉考九卷

浙江鮑士恭家藏本

明張朝瑞編朝瑞有忠節錄已著錄是書專考明代科舉之制首爲場屋事例一卷於沿革之故言之頗詳附以貢舉紀略不入卷數二卷以下則起洪武三年庚戌迄萬歷十七年己丑其目錄止於

萬歷癸未蓋丙戌以後又以次而增也每科載會試考官試題及所刻程文之目殿試之榜首尾全錄會試之榜則惟錄前五人鄉試之榜則惟錄各省第一人其有名臣碩儒足傳於後者皆附記於制策之末名姓籍貫之異同亦附註焉其考據頗爲詳核惟貢舉紀略載狀元年老年少之類類乎說部於體例爲未安第一卷事例之中雜引諸儒之論至於引桂有三種紅爲狀元黃爲榜眼白爲探花以證鼎甲三人名所自起尤爲蕪雜矣

諡苑二卷 浙江范懋柱家天一閣藏本

明朱睦㮮撰睦㮮有易學識遺已著錄是編上卷輯古諡法十二家曰史記諡法解曰周書諡法曰蔡邕獨斷諡法曰蘇洵諡法曰周公諡法曰春秋諡法曰廣諡法曰沈約諡法曰賀琛諡法曰扈蒙諡法曰鄭樵諡法曰陳思諡法其周公春秋廣諡沈約賀琛扈蒙六家則睦㮮增輯也周亮工作書影嘗疑漢蕭何諡曰文終不知於諡法居何等今考周公諡法下

卷乃有終字則其傳已久然其書最不可解堯舜禹湯謂之諡此猶相傳有說帝皇王侯君公亦列為諡設帝當諡帝將曰帝帝王當諡王當曰王王乎又設帝當諡王侯當曰王帝侯帝王侯當諡帝當曰帝王帝侯乎此等宜有所辨正一概因其原文不足以為考證王圻續文獻通考舛漏百出其與古書不合者皆校刻之誤乃據之以註異同尤為失考唐會要亦有諡法篇漏而不收亦為疎略下卷列明代王侯以下至於守令之諡不及鮑應

金定四庫全書總目卷八十三
鼇書之賅備又頗舛誤參以諸書如徐溥諡文靖而曰文穆顧鼎臣諡文康而曰文簡喬宇諡莊簡而曰端簡馬昂諡恭襄而曰忠襄墨麟諡榮毅而曰文毅不一而足則亦不盡可據矣

王國典禮八卷

江蘇周厚培家藏本

明朱勤美撰勤美字伯榮開封人鎮國中尉睦樛子爲周藩宗正以文學世其家是書採輯宗藩成憲勒爲一書分聖訓玉牒講讀冠禮婚禮爵秩冠服宮室儀仗祿米田地祀禮之國錫命慶祝入覲

奏事宴饗喪禮事例管理宗子獎勵懲戒秩官儀賓兵衛倉庾支鹽諱禁凡三十類每類又各有子目

孔廟禮樂考六卷

兩淮馬裕家藏本

明瞿九思撰九思有春秋以俟錄已著錄是書於孔廟禮樂沿革同異考證頗詳勝他家鈔撮舊文有同簿籍者惟二卷以從祀諸弟子編爲歌括殊乖體例

歷代貢舉志一卷

編修程晉芳家藏本

明馮夢禎撰夢禎字開之秀水人萬歷丁丑進士

官至國子監祭酒是書敘歷代貢舉之制如敘周官而於大司徒鄉老大宰內史選士之法不詳敘漢制而誤以董仲舒之舉賢良在建元之初魏晉以降中正九品之法盛行遼金元亦有進士科及薦舉制科載於各史志者甚悉夢禎一概略之未免過簡不足以資考證也

明典禮志二十卷

浙江巡撫採進本

明郭正域撰正域有批點考工記已著錄是書其官禮部尚書時所輯第一卷爲登極儀二卷爲朝

儀三卷爲宴享儀四卷爲尊號五卷至七卷爲冊封八卷爲冠禮九卷爲婚禮十卷爲喪禮十一卷爲耕藉十二卷爲親蠶十三卷爲經筵日講諸儀十四卷爲出閣讀書諸儀十五卷爲巡狩十六卷爲監國十七卷爲儀仗十八卷爲冠服十九卷爲宮室共子目一百二十有七二十卷爲雜典禮共子目六十有六敘次亦尚明簡而體例頗叢脞朝儀既自爲卷而外戚朝見又入雜典禮中進實錄進玉牒受降獻俘宣捷皆國之大事亦入雜典禮

中至於郊祀宗廟乃闕而不載尤不喻其故也

學科考略一卷

編修程晉芳家藏本

明董其昌撰其昌字元宰華亭人萬歷己丑進士官至禮部尙書諡文敏事蹟具明史文苑傳是書敘歷代立學之制兼敘孔廟封贈配享之始而貢舉之志兼及焉如敘太公廟起於唐而宋以後不載敘明經起於漢而唐宋明經之選亦不載殿試親策祇載漢唐及宋而遼金元悉不載殊爲疎略此與馮夢禎歷代貢舉志俱載於學海類編中疑

亦鈔撮割裂而成也

明諡考三十八卷

山東巡撫採進本

明葉秉敬撰秉敬有字學已著錄是書採集有明一代諸臣之諡創爲冠額之法以上一字爲冠下一字爲額復依四聲次第列其例頗爲杜撰而所載之諡亦多舛誤如宋濂正德閒追諡文憲而作文惠又載陶琰鄭世威俱諡恭介而不及陳有年有年得諡在萬歷二十六年書中載趙志臯諡

欽定四庫全書

文懿在二十九年則不可謂非考據之疎矣末一

卷所載祖父子孫得諡者亦多所遺漏未為詳

贍

饒堂考故一卷

浙江巡撫採進本

明張鼎撰鼎有吳淞甲乙倭變志已著錄此其官

司業時所述明代國學典故兼及軼事大旨主於

端師範抑倖進其言多切要中理惟所載國學官

陳言國事一條於義未允師儒之官掌教化而已

必以與聞朝政為美談是未考宋季三學之弊者也

案黃佐南雍志入職官而此及辟離紀事別

入政書者佐所志者以太學官制職掌為綱

二書則但述故事也

諡法纂十卷

浙江汪啟淑家藏本

明孫能傳撰能傳字一之甯波人萬歷丙辰進士

官至工部員外郎即嘗與張萱同編內閣書目者

史部

政書類存目一

三

此書詳考易名之制首功令次諡法次尊諡次臣諡而以議論終焉大抵據內閣冊籍鈔錄成書其例頗與葉秉敬諡考相同而不及其精密

秦璽始末一卷

編修程晉芳家藏本

明沈德符撰德符字景倩一字虎臣秀水人萬歷戊午舉人元世祖至元三十一年有獻傳國璽者御史兗州楊桓考辨定為秦物見於輟耕錄德符

以為不確因歷引宋李心傳之說及五代會要并晉史通鑑等書以證元所得之非秦璽然傳國一璽歷代傳聞紛如聚訟恭讀我

皇上御製

國朝傳寶記折衷定論大哉

王言允足垂訓億禩若德符之斷斷爭辨猶不揣其本而齊其末耳

年號韻編一卷

浙江汪啟淑家藏本

明陳懋仁撰懋仁有泉南雜志已著錄是書仿表譜之法橫格分正統偏閏僭偽叛亂蠻夷五等直格下貫則同一年號年號前後之序則依韻部編次以便檢閱體例頗亦詳密其中凡前代年號有與明同者則削除不載如張重華方臘皆號永樂則以成祖故去之蓋不欲使僭亂之人與祖宗同號亦臣子之誼宜然不得訾以遺漏惟其所分之等更始則列正統隋文乃居偏閏既已未安又道

經有龍漢中皇之類羽流妄說不載可也列之僭偽亦覺不倫視鍾廣漢歷代建元考不及遠矣書成於天啓中而中有崇禎年號當爲刊版於崇禎故隨時補入歟

明三元考十四卷

浙江汪啟淑家藏本

明張宏道張凝道同撰宏道字成儒凝道字明儒武進人其書專紀明代鄉會殿試之元魁鼎甲或非元魁而後至貴顯及一門科名極盛者亦咸載焉始於洪武三年庚戌鄉試終於萬歷四十

七年己未會試每科具詳京省主試官大致與張

朝瑞書互相出入

萬古法程一卷

浙江巡撫探進本

明袁應兆撰應兆有大樂嘉成已著錄是書統載學宮從祀先賢先儒名氏位次而考證其是非如所辨複姓皆題一字之類自是下邑之謬不足以簡牘相爭其他所辨字畫則舛陋頗甚若辨句井疆句字謂當作勾宋人避康王諱始改勾爲句不知說文句本從口廣韻註句從口不從厶具有明

文也

碎雍紀事

無卷數 兩淮馬裕家藏本

明盧上銘撰上銘字爾新東莞人崇禎中官南京國子監典簿是編敘述明代太學典故起洪武訖崇禎十年詳於南監而北監亦附見焉

學典三十卷

副都御史黃登賢家藏本

國朝孫承澤撰承澤有尚書集解已著錄是書所載皆歷代建學設官行禮講學科舉之事自虞訖明分年編載惟前代僅居八卷而明代之事多至二

十二卷如釋奠之禮凡各史志紀所載者皆未收
入既載國子監學興廢創置而各朝學官之職學
宮之制又皆闕焉至泮宮習射及各經列於學官
者如漢之石經唐之寫經石經後唐之鈔版卷中
皆未言及而明代一切章疏毫無關於學典者乃
一概濫入蓋門戶之見既深無往不用其標榜也
文廟從祀先賢先儒考一卷 編修程晉芳家藏本
國朝郎廷極撰廷極字紫衡鑲黃旗漢軍此本題曰
廣甯其原籍也官至江西總督是編歷考從祀先

賢先儒名氏之同異如辨顏幸之作辛而不知通
典之作柳咸淳臨安志之作韋辨南宮适之作韜
而不知一作緇一作括辨司馬耕之作黎耕而不
知一作子耕未免考訂之疎惟所辨文翁之圖較
家語多五人家語較文翁之圖多九人及正殿配
享東西兩廡位數引據頗為典核

頓宮禮樂全書十六卷

兩淮馬裕家藏本

國朝張安茂撰安茂字蓼匪松江人順治丁亥進士
官至浙江提學僉事其書分學校褒崇廟制釋奠

從祀祀禮釋詁祀樂樂律樂譜樂舞釋菜啓聖祠
名宦鄉賢祠十四門大抵祖李之藻頓官禮樂疏
王煥如文廟禮樂書少增損之其凡例稱李博而
富其失也滯王簡而通其失也弱然觀其所作亦
無以遠勝二書也

琉球入太學始末一卷

山東巡撫
採進本

國朝王士禎撰士禎有古懽錄已著錄先是康熙二
十三年翰林院檢討汪楫中書舍人林麟焟冊封
琉球歸奏中山王尙貞請以陪臣子入國學

聖祖仁皇帝俯允所請士禎因紀其始末其中追敘明代

琉球入國學事於洪武二十五年祇紀中山而失
載山南又二十六年中山復遣寨官子入國學永
樂八年山南遣官生三人入國學俱未及載蓋沿
舊本太學志之誤也其書已見士禎帶經堂集中
此蓋初出別行之本

國朝諡法考一卷

山東巡撫
採進本

國朝王士禎撰始於

國初下迄康熙三十四年大臣之

賜諡者咸錄焉凡親王十八人郡王十五人貝勒十二人
貝子十二人鎮國公十一人輔國公十六人鎮國
將軍五人輔國將軍七人妃三人公主二人額駙
二人藩王七人民公九人侯伯十四人大學士二
十七人學士四人詹事一人尙書二十七人侍郎
九人都御史三人八旗大臣一百六人總督十七
人巡撫十七人殉難監司三人提督十七人總兵
官八人前代君臣二十六人外藩一人

辨定嘉靖大禮議二卷

浙江巡撫
採進本

國朝毛奇齡撰奇齡有仲氏易已著錄是書力斥楊
廷和之議而又不屑與張桂相雷同謂張桂較廷
和議爲正特不知根柢經傳凡爲辨二十四篇援
據典確亦可備一說惟謂世宗旣嗣武宗卽當以
武宗爲父引公羊傳爲人後者爲之子作證然奇
齡於所著春秋毛氏傳及曾子問講錄內論仲嬰
齊卒一條則又力闢公羊之誣謂嬰齊不得以兄
子家爲父父仲遂爲祖又於經說中力排汪琬誤
信公羊傳爲人倫之禍而此辨忽主此說前後矛

盾殆不可解又謂世宗竝當爲所生持服三年則雖當時張桂諸人猶未敢創爲此論奇齡乃忽發之考儀禮喪服經曰爲人後者爲其父母報傳曰何以期也不貳斬也何以不貳斬也特重於大宗者降其小宗也若世宗又爲所生斬是貳斬矣卽曰經文專爲宗子言之不知宗子之尊孰若天子言宗子則通於天子矣奇齡又謂經文明云爲人後者爲其父母報則於所生父母不改稱也旣於父母不改稱卽不得改三年服制然儀禮雖不易

父母之名而仍降在齊衰期服章內則終不得服以父母之服矣奇齡所引不足自證適以自攻耳考通典徐邈荅孔注曰史皇孫皇考之名特稱謂耳未足以明服之輕重其論可與喪服傳相發明奇齡乃取徐邈已廢之說改飾更張實乖典制其餘各條閒有可采然不足救大本之乖謬也

制科雜錄一卷

浙江巡撫採進本

國朝毛奇齡撰皆記康熙己未

召試博學鴻詞始末中多露才揚己之詞且有恩怨是非

之語猶是前代門戶餘習不盡足據也

彙征錄一卷

兵部侍郎紀昀家藏本

不著撰人名氏記康熙十七年薦舉博學鴻詞名氏爵里及

御試中選人數次第謹案是年正月

聖祖仁皇帝諭吏部曰自古一代之興必有博學鴻儒振起文運闡發經史潤色詞章以備顧問著作之選朕萬幾餘暇游心文翰思得博洽之士用資典學我朝定鼎以來崇儒重道培養人材四海之廣豈無奇才碩彥學

問淵通文藻瑰麗可以追蹤前喆者凡有學行兼優文詞卓越之人不論已仕未仕令在京三品以上及科道官員在外督撫布按各舉所知朕將親試錄用其餘內外各官果有真知灼見在內開送吏部在外開報督撫代爲題薦務令虛公延訪期得真才以副朕求賢右文之意尋內外薦送一百八十六人應

詔至京者一百四十三人十八年二月朔於

體仁閣

賜宴試璿璣玉衡賦省耕詩入選者一等二十八人二等三

十人皆授翰林入館纂修明史其餘現任者回任候補者歸部未仕者回籍年老者

命吏部議給職銜文運昌明人才蔚起

熙朝盛典誠萬古為昭其閒與選者承明著作各有流傳即未與選者亦皆觀感奮興不懈而及於古其所撰述今著錄於四庫者尙班班可考此編雖案牘之文然觀其所載亦足以見棫樸菁莪之盛也惟讀卷諸臣如杜臻李蔚馮溥葉方霽俱不載及年老

賜職諸人具有姓名亦未臚列則記錄之疎耳

國學禮樂錄二十四卷

浙江巡撫探進本

國朝李周望謝履忠同撰周望字渭湄蔚州人康熙丁丑進士履忠字方山昆明人康熙癸未進士是編乃周望官祭酒履忠官司業時所輯自孔子世系及先賢先儒列傳列朝祀典禮樂圖譜并石鼓潘迪音訓而以祭酒司業題名終焉所列頗多疎漏如祀典中既載晉泰始七年皇太子講經釋奠而元康三年之講經釋奠乃佚不錄樂器之載於

諸經註疏及歷代史志者甚詳茲僅列史記漢書
寥寥數則至石鼓自唐以來辨論甚多如楊慎所
偽則字完於真本周秦石刻釋音則補以圍方皆
各有考據是編概不徵引而僅載音訓一篇亦未
免稍略矣

紀元彙考三十五卷 大學士程景伊家藏本

國朝黃琳撰琳有經學淵源錄已著錄是書取歷代
紀元之號自漢至明悉以朝代次第纂輯分正統
列國僭竊外夷四門凡史鑑之外稗官野史有關

考訂者悉搜採補入其例以所紀之元爲綱以前
後所同者詮註于下採輯亦頗該洽然如後魏及
遼金俱載入列國條下與西夏諸國相同殊屬比
擬不倫又如紀遼太祖名爲耶律健德考遼史及
契丹國志竝無此名又遼興宗之改元景福次年
卽改重熙亦無崇興之號頗不免於疎舛

聖門禮樂統二十四卷 山東巡撫採進本

國朝張行言撰行言字躬先江浦人是書卷首爲綱
領不入卷數一卷至五卷詳載歷代祀典六卷載

孔子世家及宗子世表七卷至十五卷為四配十哲先賢先儒列傳十六卷為從祀啓聖祠先賢先儒列傳十七卷為改祀罷祀諸儒列傳十八卷至二十三卷為樂經樂志樂器律品譜圖二十四卷載孔子及四配林廟諸圖其哀輯極繁而徵引諸書仍不出尋常習見

學宮備考十卷

浙江巡撫採進本

國朝彭其位撰其位字素君吳縣人是書前八卷自孔子以及從祀諸儒各為之傳九卷則載歷代禮

樂典制卷末附錄未從祀者申黨孺悲公孫尼子公明子儀公明子宣樂正子春檀弓河閒王德文翁孔氏孟皮凡十人所考禮樂典制頗多挂漏

四譯館考十卷

浙江鮑士恭家藏本

國朝江縈撰縈有奏議已著錄是書略記外藩朝貢之目恭載

列祖敕諭及

賜予物數皆

實錄會典之所有其國俗土風則摭摭前代史傳為之多

不確實後系以集字詩二卷皆纂所自作而以諸國字譯之詩既無關於外藩所譯之字又不能該諸國之字則亦戲筆而已不足以資掌故也

太常紀要十五卷

江西巡撫採進本

國朝江纂撰是編乃纂爲太常寺卿時以太常寺考及太常續考所載止於明代因考核近制勒爲一書分祀訓祀儀祀例祀禮祀官祀賦六門其書成於康熙壬午於時

皇清禮書尙未纂修故纂有此著也

紀元要略二卷補遺一卷

江蘇巡撫採進本

國朝陳景雲撰景雲有通鑑胡註舉正已著錄是書紀漢迄明帝王建元及歷年其子黃中又摭歷代僭偽之號附以外國爲補遺一卷景雲於分據諸朝各爲紀載彼此互註不分大書附書體例最公然皆史傳所習見取便檢閱而已

歷代帝系年號二十卷

江西巡撫採進本

國朝劉宗魏撰宗魏字友韓號柚航贛州人乾隆戊辰進士官至監察御史是書以歷代帝系年號爲

欽定四庫全書總目卷八十三
名乃兼及割據僭竊下至李自成張獻忠亦入記
載而所列割據僭竊又不能詳備體例頗為冗碎
右政書類典禮之屬四十七部三百十九卷內二部
無卷數
皆附存目

欽定四庫全書總目卷八十三

漢軍樊封初校
南海潘繼李覆校

欽定四庫全書總目卷八十四

史部四十

政書類存目二

邦計彙編一卷

編修程晉
芳家藏本

舊本題宋李維撰維字仲芳肥鄉人雍熙二年進
士召試中書知制誥歷翰林學士工部尚書柳州
觀察使事蹟具宋史本傳是書載曹溶學海類編
中實冊府元龜邦計一門之總敘案晁公武讀書
志載修冊府元龜時預修者十五人維居第四又

載初撰編敘諸儒皆作真宗以體制不一遂擇李維錢維演陳彭年劉筠夏竦等付楊億竄定其剽剽此敘詭題書名而以為維之所撰蓋以此云

拯荒事略一卷

編修程晉芳家藏本

舊本題元歐陽元撰元字原功瀏陽人延祐二年進士除同知平江州事調蕪湖武岡二縣尹召為國子博士遷翰林待制天歷初授藝文少監纂修經世大典至正初以學士告歸詔修宋遼金三史起為總裁官拜翰林學士承旨至正十七年卒諡

曰文事蹟具元史本傳是書前有自序稱蕪湖本南方澤國比隣數邑竝在水鄉每當春夏之交陽侯不戢遂成饑歲余忝為令長因輯拯荒事略一編云云與本傳稱嘗知蕪湖縣語相合然其書但引故實二十二條無一字之摩畫其唐天復甲子竹放花結米一條尤不近理竹米偶生非人力可致採食竹米亦何需官為經理耶學海類編所載諸書十有五偽此書殆亦託名於元也

寶鈔通考八卷

永樂大典本

元武祺撰祺里貫未詳至正十三年爲戶部尙書
因當時鈔法漸壞浮議者但以不動鈔本爲名而
不詳流通之實乃歷考中統以後八十餘年中鈔
法撰爲此書大旨謂自世祖至元二十四年至武
宗至大四年二十五年中印者多燒者少流轉廣
而鈔法通自仁宗皇慶元年至延祐七年共九年
印雖多而燒亦多流轉漸少鈔法始壞自英宗至
治元年至三年印雖多而燒者寡流轉愈多鈔法
愈壞自泰定元年至至順三年共八年印者少而

燒者多流轉絕無鈔法大壞復合計六十四年中
總印鈔五千九百五萬六千餘錠總支五千六百
二十餘萬錠總燒三千六百餘萬錠民間流轉不
及二萬錠以經世大典所載南北戶口民數計之
其無鈔可用者至二千萬戶之多民生安得而不
匱財用安得而不絀乎其言可爲行鈔之戒元史
食貨志所載鈔法僅詳其制度數目而於財之息
耗民之貧富未之詳言似乎未見祺書存此一編
亦可以補史之闕然此書在當日爲洞悉利弊之

言在今日則鈔法之不可行無智愚皆能知之無待縷陳矣故撮舉大要附存其目而書則不復錄焉

元海運志一卷

編修程晉芳家藏本

舊本題明危素撰素有草廬年譜已著錄是編載曹溶學海類編中驗其文乃邱濬大學衍義補之海運一條也亦不善作偽矣

漕政舉要錄十八卷

浙江范懋柱家天一閣藏本

明邵寶撰寶有左臚已著錄是編乃正德己巳寶

官副都御史總漕江北時所作卷一至卷六為河渠之政卷七為舟楫之政卷八為倉廩之政卷九為卒伍之政卷十卷十一為轉輸之政卷十二為統領之政卷十三至卷十五為紀載之政卷十六為稽古之政卷十七為準今之政卷十八以雜錄終焉

鹽法考略一卷錢法纂要一卷

編修程晉芳家藏本

舊本皆題明邱濬撰濬有家禮儀節已著錄此二書諸家書錄皆不載以其文考之即濬大學衍義

補中之兩篇也曹溶割裂其文竝載學海類編中較其以元海運志為危素撰者猶為近實然摘錄巨帙之一篇即別立新名亦猶之乎作偽也

鐵冶志二卷

浙江巡撫採進本

明傅浚撰浚字汝源南安人宏治己未進士官至工部郎中正德癸酉浚督理遵化鐵廠創為此志自建置山場迄於雜職凡二十三目冠以公署鐵廠二圖所紀皆歲辦出入之數頗瑣屑無裨考證案明史職官志載工部分司祇有提督易州山廠

柴炭一員而浚所志遵化分司始委主事宏治中改用郎中奉敕董理列歷官姓名甚悉不知史志何以遺之殆其後又經裁汰耶

陽明鄉約法一卷

浙江巡撫採進本

明王守仁撰守仁字伯安號陽明餘姚人宏治己未進士官至兵部尙書封新建伯事蹟具明史本傳是書已載陽明全書中崇禎閒嘉善陳龍正復錄出別行其法有約長約副約正約史知約約贊諸人已極繁瑣至爭鬪賦役諸事以至寄莊人戶

納糧當差皆約長主之蓋欲以約長代周官比長
黨正之法然古法亦未必盡宜於今也

陽明保甲法一卷

浙江巡撫
採進本

明王守仁撰悉載牌諭諸文亦見陽明全集中陳
龍正錄出別行而各附題識於其下

救荒活民補遺書三卷

浙江范懋柱家
天一閣藏本

明朱熊撰熊字維吉江陰人取宋從政郎董煟原
書而益以有明卹賑制詔及前代好施獲福事蹟
其立意不為不善然序述典故備錄經典重農之

語則迂而不切雜載諸史賑卹之文則繁而鮮要
皆不免勦襲陳言無裨實政至於盛陳福報尤涉
於有為而為蓋鄉里勸施之格言而非經國之碩
畫二氏因果之緒論而非儒者之正理也

鹽政志十卷

兩江總督
採進本

明朱廷立撰廷立通山人嘉靖癸未進士官至禮
部右侍郎嘉靖八年廷立以河南道監察御史奉
使清理兩淮鹽政因博考古今鹽制以成此書凡
分七門日出產日建立日制度日制詔日疏議日

鹽官曰禁令每門各分子目凡三百九十有四蓋
制詔疏議每一篇立一目故其繁至是也

嘉靖清源關志四卷

兩淮鹽政
採進本

明劉璽撰璽字雙泉濟州衛籍唐縣人嘉靖壬辰
進士官至右副都御史巡撫宣府是編乃璽以戶
部主事監理臨清關稅時所編卽是關之條例也
序稱嘉靖九年以前案牘無徵故舊事皆不載是
猶可以散佚委也其凡例云凡例制不合於今者
亦棄不取則是徵課簿籍榜示商賈吏役者耳志

乘以存舊典甯計其現行否耶璽自序稱訪於僚
屬或曰孫松山監清源有聲過通州會松山松山
因出所集清源關權政錄示余遂因而補葺爲此
書則其原本實爲簿籍宐其如是矣璽任滿未及
刊繼其事者爲蒲田雍潤乃授之梓書中凡署潤
名者又所續增也

淮關志八卷

兩淮馬裕
家藏本

明馬麟撰麟巴縣人嘉靖戊戌進士官南京戶部
員外郎是書凡分八門其建置不敘淮關之始末

而泛引歷代征商典故綴為一卷殊為汗漫又地志列藝文一門原為風土而設此志不過徵權之條格一關之外皆非所屬而亦濫載藝文尤非體例矣

茶馬類考六卷

兩淮馬裕家藏本

明胡彥撰彥沔陽人嘉靖辛丑進士官巡察茶馬御史因歷考典故及時事利弊作為此書明制茶馬御史兼理甯夏鹽務故第三卷併記鹽政云

海運詳考一卷海運志二卷

浙江范懋柱家天一閣藏本

明王宗沐撰宗沐字新甫臨海人嘉靖甲辰進士官至刑部左侍郎事蹟具明史本傳是編乃隆慶六年二月宗沐任山東布政使時議開海運而作所載皆其議事呈文是年七月復設海運志於詳考之外增入海運圖竝海運路程奏疏事宐考宗沐官右副都御史總督漕運時請復海運其疏載所著敬所文集中本傳亦載其略然史載宗沐運米十二萬石自淮入海抵天津南京給事中張煥言比聞八舟漂沒失米三千二百石宗沐預計有

此私令人糴補米可補人命可補乎宗沐掩飾視聽非大臣諛宗沐疏辨求勘詔行前講習海道以備緩急未幾海運至卽墨颶風大作覆七舟都給事中賈三近御史鮑希顏及山東巡撫傅希摯俱言不便遂寢時萬歷元年也云云宗沐蓋掇拾邱濬大學衍義補之陳言以僥倖功名不知儒生紙上之經濟言之無不成理行之百不一效也觀於宗沐可以爲妄談海運之炯戒矣

洲課條例一卷

兩淮鹽政採進本

明王傑撰傑始末未詳其作此書時則官南京工部營繕司員外郎也明代自鎮江至九江沿江洲課皆隸南工部後以其有影射吞占之弊復設官以董之明史食貨志未詳其法蓋以其併八地糧內也是編乃嘉靖中傑爲督理時所輯首載敕諭及課銀數目取用條例次載准奏事例八條部司酌議事宜九條可以考見一時之制千頃堂書目載蘆政條例一卷不著撰人註曰嘉靖己酉南京工部營繕司主事惠安莊朝賓序刊此書有朝賓

序與黃虞稷所載合殆卽一書而異名蓋洲課卽蘆政也

兩淮鹽法志十二卷

兩淮鹽政採進本

明史起醵張矩同撰起醵江都人矩儀徵人書成於嘉靖庚戌因宏治舊志增損之董其事者巡按御史楊選與運使陳暹也

漕書一卷

兩淮鹽政採進本

明張鳴鳳撰鳴鳳有桂勝已著錄是書專論漕運利弊分爲八篇曰漕政漕司漕軍漕河漕海漕船

漕倉漕刑力主海運之利又以漕船工料不堅入水易破欲採木川湖大治萬餘艘斥餘材以支數十年用又以丹陽京口并出於江水淺船多欲別開運道由孟瀆趨白塔河至揚州其說頗多難行

明通寶義一卷廣通寶義一卷

浙江范懋柱家天一閣藏本

明羅汝芳撰汝芳有孝經宗旨已著錄前明錢鈔通行其弊百出汝芳督屯慎省以慎爲鑄錢之藪因作此書以明其利弊大旨以錢制大小輕重貴在持平乃足爲萬世之利歷引古來錢制始自太

吳軒較下迄唐宋臚列具備其第一篇本義引據唐人錢譜謂秦世八銖失之太重漢初榆莢失之太輕按文獻通考秦兼天下銅錢質如周錢文曰半兩漢高后二年始行八銖錢是八銖之名定於漢謂秦世八銖非也又考唐武德四年廢五銖錢鑄開通元寶錢其文則歐陽詢所書迴環讀之曰開通元寶今書悉謂開元通寶亦非本義

海運新考三卷

副都御史黃登賢家藏本

明梁夢龍撰夢龍有史要編已著錄隆慶末夢龍

巡撫山東適徐邳閒漕河淤塞漕運總督王宗沐請復海運下夢龍任其事檄青州道潘允端等履勘試行之南自淮安至膠州北自海倉口至天津三千三百餘里運米二千石舟行無礙因爲條具以奏併取前後疏議奏記考說輯爲一編宗沐疏所謂巡撫都御史梁夢龍毅然試之底績無壅者也其論海道曲折頗爲詳備自邱濬爲大學衍義補極言海運之利然海運再遭飄溺宗沐亦疊被彈劾事竟不行此云旣而運通報後夢龍亦遷秩

去其議遂寢者亦文飾之詞耳

海運編二卷

戶部尚書王際華家藏本

明崔旦撰旦字伯東平度人是書成於嘉靖甲寅時因運道艱阻議者欲開膠萊河以復海運由淮安清江浦口歷新埧馬家壕至海倉口徑抵直沽止循海套可避大洋之險旦居海濱習知利害地方大吏咨以開濬之策旦亦以為必可行惟欲改馬家壕道從麻灣口所條上工役之法堤閘之制甚具嗣以遣官勘視言水多沙磧其事遂寢旦因

檢所作議考諸篇錄而存之

山東鹽法志四卷

兩淮鹽政採進本

明查志隆撰譚耀詹仰庇參修志隆字鳴治海甯人嘉靖己未進士官至山東布政司左參政耀東莞人萬歷丁丑進士官至監察御史仰庇安溪人嘉靖乙丑進士官至刑部侍郎是編乃志隆官山東鹽司同知時所作耀時巡鹽長蘆仰庇時為山東按察司副使正統中命長蘆巡鹽御史兼理山東鹽法隆慶五年又令山東驛傳副使兼管鹽法

故皆得與志隆裁訂焉

八閩政議三卷

浙江范懋柱家天一閣藏本

不著撰人名氏亦無序跋皆載明嘉靖三十二年福建布政使及福甯道參政條議申文曰鹽法綱銀運脚各爲一卷蓋當時布政司所刊則例也

海運圖說一卷

浙江范懋柱家天一閣藏本

明鄭若曾撰若曾有鄭開陽雜著已著錄是編前列二圖後系以說末附海運故道海運之說古無其事杜甫後出塞詩所謂漁陽歡樂地擊鼓吹笙

竿雲帆轉遼海粳稻來東吳者不過盛陳邊帥驕奢能遠致難至之物以供飲食非謂其時果泛舶以資軍儲也明人徵元末中原梗阻運道不通之弊多喜講求海運以備不虞不知政理修明則四海一家何慮轉輸之不達如其中原失馭盜賊縱橫雖遠涉波濤供粟億萬亦何裨於敗亡哉至邱濬考校歷年漂沒之數以爲省漕渠之所費足以補海道之所失不思歲有沈溺篙工舵師之命動輒千百又以何者抵之歟若曾此書亦狃是見皆

可謂不求其本者也

蘇松浮賦議一卷

浙江范懋柱家天一閣藏本

明鄭若曾撰其說已具其所撰萬里海防編內此則縷析地畝科徵之數而詳悉陳之嘉靖中嘗條上當事力請入告會格於倭變不果行此其遺橐也

重修兩浙鹺志二十四卷

浙江巡撫採進本

明王圻撰圻有東吳水利考已著錄是書圖說二卷詔令一卷鹽政十三卷職官表一卷列傳一卷

奏議三卷藝文三卷前有自序謂武陵楊鶴巡按浙江以鹽規類略酉戌沿革行鹽事宜三書竝舊志授圻增訂遂采其要約綴入各款令引票之損益價值之低昂課額之盈縮徵解之緩急商竈之疾苦犁然具載於浙中鹺務紀錄頗詳然多一時補苴之法不盡經久之制也

漕運通志十卷

浙江范懋柱家天一閣藏本

明楊宏撰宏字希仁海州大河衛人嘉靖中以指揮使署都督同知總運江北舊有漕運志宏病其

未備乃摭摭羣書手自記錄延甌甯謝純考古今沿革作表六卷首漕渠次漕職次漕卒次漕船次漕倉次漕數作略三卷首漕例次漕議次漕文序謂表立則經見略輯則緯彰書凡十卷而序云九卷者蓋漕渠文繁分爲二卷故也

救荒事宜一卷

江西巡撫採進本

明周孔教撰孔教有中丞疏橐已著錄是編乃其官應天巡撫時以三吳被水而作分目二十三條附議三條大旨不出周官荒政之意蓋當時所頒

條教而其屬官爲之刊行也

長蘆鹽法志十三卷

浙江汪啟淑家藏本

明何繼高馮學易閔遠慶同撰繼高字汝登山陰人萬歷癸未進士官至江西布政司參政學易字韋卿臨海人隆慶丁卯舉人官至長蘆鹽運司運同遠慶字基厚烏程人萬歷丙戌進士官至四川按察使僉事纂是書時繼高方爲運使遠慶方爲運判故三人以現行鹽法事例參稽典故其相酌定云

通漕類編九卷

浙江汪啟淑家藏本

明王在晉撰在晉有歷代山陵考已著錄是書先漕運次河渠附以海運海道前有自序并作書凡例大抵採自官府冊籍無所考訂在晉爲經略時值時事方棘一籌莫展逡巡移疾而去蓋好談經濟而無實用者是書殆亦具文而已

粵東鹽政考二卷

兩淮鹽政採進本

明李樾撰樾字長儒鄞縣人萬歷辛丑進士官至兵部侍郎事蹟具明史本傳是書乃樾官廣東按

察使僉事統理鹽法時所作上卷載鹽律鹽官鹽署鹽產鹽課鹽餉鹽廠鹽牙鹽包鹽斤下卷載鹽秤鹽單鹽票鹽旗鹽船鹽限鹽籍鹽會鹽界鹽運於漕政利弊頗爲詳悉其於鹽官題銜之後不紀宦績并不具全前後居官者姓名蓋專爲鹽政而作與他志體例不同也繼樾任者張邦翼楊瑩鍾龔承薦皆有所續刻各見所撰序文中然於原書體例則無所改易焉

北新鈔關志十六卷

兩淮馬裕家藏本

欽定四庫全書

史部 政書類存目二

明荆之琦撰之琦丹陽人萬歷甲辰進士仕履未詳是書分十六門其建置命遣禁令經制則例課額責委鈐轄區行利弊因革宦蹟公署人役十四門皆關政之所當考其藝文一門亦沿淮關志之例非所應有也

開荒十二政一卷

直隸總督採進本

明魏純粹撰純粹柏鄉人官永城縣知縣因萬歷三十六年純粹在永城開墾荒田招集流民條上十二議併以其事繪爲圖其時上官批荅及士民

歌頌皆附焉純粹卽大學士裔介祖也

國賦紀略一卷

編修程晉芳家藏本

舊本題明倪元璐撰元璐有見易內外儀已著錄是書載古來賦稅諸法每類引故實一條疎陋萬狀必非元璐所爲殆亦鈔撮類書策略數條嫁名元璐耳學海類編所收大抵此類也

救荒策會七卷

浙江巡撫採進本

明陳龍正撰龍正字惕龍嘉善人崇禎甲戌進士授中書舍人左遷南京國子監丞福王召爲禮部

祠祭司員外郎事蹟具明史本傳宋董煟輯古今救荒活民書三卷元張光大續之明朱熊復加補綴龍正是編則合三家之書刪其繁複而附以崇禎庚辰辛巳嘉善救荒之事其斥朱熊之書雜陳詭異之事持論頗正然大旨不出董煟書也龍正喜談經世之術此亦其一崇禎末嘗建議開墾畿輔河南山東荒田以省轉運史謂是時中原殘破有田不得耕龍正守常理而已則其所講亦僅紙上之談矣

古今齟略九卷齟略補九卷

浙江汪啟淑家藏本

明汪珂玉撰

案明詩綜作珂玉字之誤也

珂玉字玉水徽州人

寄籍嘉興崇禎中官山東鹽運使判官是書前後兩編卷首皆有自序齟略九卷凡分生息供用職掌會計政令利弊法律徵異雜考九門名曰九府齟略補亦按九門分類拾遺珂玉當明季匱乏之時欲復漢牢盆之制而用宋轉般之法案般字今案續皆書為搬考李壽通鑑長編凡轉搬皆作此般字珂玉蓋因其原文其意雖善而於勢恐不可行其所徵引務為浩博多蒐古典亦不切

後世時勢至旁及遐荒又無關於中國之鹽政
矣

救荒事宜一卷

編修程晉
芳家藏本

明張陞撰陞字登子山陰人崇禎庚辰歲大饑劉
宗周及祁彪佳皆里居宗周倡議煮粥彪佳倡議
平糶陞更出其家粟五百石佐二人所不及慮賑
或未周貲或虛糜於是斟酌情形創為十法一聚
米二踏勘三優恤四分別五散米六核實七漸及
八激勸九平糶十協力擘畫具有條理多所全活

陞因疏其綱要為此書

鹽法考十卷

江蘇周厚
堉家藏本

不著撰人名氏亦無序目首總論次兩淮次兩浙
次長蘆次山東次福建次河東次陝西次廣東所
載事迹至崇禎初年而止疑為明末人所作也

淮鹺本論二卷

兩淮鹽政
採進本

國朝胡文學撰文學有疏彙已著錄是書乃文學於
順治庚子辛丑閒官兩淮巡鹽御史時所作上卷
分十篇曰停兌會日附銷不帶鹽日復三府日關

橋掣規曰釐所掣曰掣江都食鹽曰淮北改所曰
撤分司曰廢興莊臨湖場曰草蕩不加稅下卷分
十五篇曰恤株連曰緩倒追曰禁私販曰除鋤棍
曰謝遊客曰簡關防祛吏弊曰不任承役曰寬追
比曰便銷批曰公僉報曰均急公寓引曰去江掣
弊曰酌歸綱曰省繁費曰修書院是時尚當
國朝定鼎之初百度新舉往往尚沿明制文學所論
蓋祇其一時之利弊云爾

明漕運志一卷

編修程晉芳家藏本

舊本題

國朝曹溶撰溶有崇禎五十宰相傳已著錄此書溶
自載於所輯學海類編中今考其文與谷應泰明
史紀事本末河漕轉運篇無一字之異溶斷斷不
至如此知學海類編決非溶家原本也

蘇松歷代財賦考一卷

江蘇巡撫採進本

不著撰人名氏其大略謂蘇松二郡之田僅居天下
八十五分之一而所出之賦竟任天下一十三分之
二其始也因張士誠之負固明太祖以租額爲官糧

其繼也以萬歷之後有司官以耗增充正數相沿
既久民困未蘇於是摘其大要彙成一書并恭錄

世祖章皇帝

聖祖仁皇帝歷年蠲欠減額諸

聖諭次載巡撫韓世琦至湯斌十人奏疏伏考蘇松浮糧
之弊業經

特沛

恩綸普釐舊額東南士女久已歌咏

皇仁恬熙化日此書所載奏疏止於康熙二十四年其情

形與今全異矣謹存其目以見

列聖以來留心民瘼閭閻疾苦無不上達

天聽者所以

厚澤深仁淪肌浹髓迥非前代之所及也

歷代山澤征稅記一卷

編修程晉芳家藏本

國朝彭甯求撰甯求字文洽長洲人康熙壬戌進士官

至左春坊左中允其書臚敘歷代山澤征稅諸政然

海稅之加不知起於漢宣帝鹽鐵之稅不知起於管

子既彙敘歷代稅法而遼代之置銀冶鐵冶金之和

買金銀治及大定中罷金銀坑治之稅與採買隨處
金銀銅冶之法元之鐵冶銅冶銀冶淘金諸政特
置官司載於史志者皆略而不及殊未爲賅備也

左司筆記二十卷

江蘇巡撫
採進本

國朝吳暲撰暲字西齋太倉人康熙戊辰進士是編
乃其官戶部時所作分疆域戶口田地正賦漕運
錢法鹽課茶馬關稅雜稅物產三庫十倉常平官
俸兵食經費設官廨署雜識二十門所載皆戶部
掌故亦兼及他部事每門敘事俱自漢唐至

國朝其稱左司者據雜識內一條云時官戶部者稱
廣東山西二司爲左右二大司暲適官廣東司而
所摭拾多一曹遺事故以左司筆記名書云

泉刀匯纂

無卷數
浙江
巡撫採進本

國朝邱峻撰峻有南湖記略稟已著錄錢譜創自顧烜
見於隋書經籍志其後封演諸人相繼有作竝已散
佚今惟洪遵之書存然遵特考其形制繪其文字而
未及於政典沿革之詳峻是書則自邃古訖於有明
典故藝文悉爲採錄分六門一曰沿革二曰利弊三

日建元四曰圖異五曰官監六曰雜編搜採頗詳亦多考證而編次雜亂無緒亦未分卷蓋未成之本也

錢錄十二卷

江蘇巡撫採進本

國朝張端木揆端木字崑喬上海人乾隆壬戌進士官至諸暨縣知縣此書卷一至卷七具載歷代錢幣并及偽朝僭號所鑄卷八至卷十載錢之不知年代者卷十一專載外國錢名卷十二則敘述古來作志之人而以洪遵泉志序終焉書中頗引遵說宋元以後則端木所蒐羅伏考

御定西清古鑒中錢錄一編圖繪精妙考據典核足折衷百

代無以復加端木蓋未及見故摭拾殘賸有此編錄耳

右政書類邦計之屬四十五部二百四十九卷

內一部無卷數

皆附存目

馬政志四卷

兩淮鹽政採進本

明陳講撰講字子學遂甯人正德辛巳進士官至山西提學副使此書乃其嘉靖三年以御史巡視陝西馬政時所作凡茶馬一卷為目九紀以茶易番馬之制鹽馬一卷為目七紀納馬中鹽之制牧

馬一卷爲目八紀各寺苑監畜牧之制黥馬一卷爲目三紀行太僕寺各軍衛稽覈馬匹之制撫敘原委頗詳明史食貨志載講嘗以商茶低偽乃第茶爲上中二品印烙籠上書商名而考之蓋亦勤於爲政者然明代茶馬之政至末造而姦商私販官吏冒支其弊不可究詰掣鹽中馬改爲納銀名在實亡亦無裨於邊計志中所列大抵皆具文而已

歷代武舉考一卷

浙江巡撫採進本

國朝譚吉璉撰吉璉有延綏鎮志已著錄是書敘歷

代武舉之制閒引唐宋諸儒奏議參證之如敘唐試武舉長垛諸例而失載穿札宋武舉之法屢變其出官之法亦極詳皆略而不敘又如遼之統和十二年詔諸道軍有勇健者具以名聞金皇統時特設武舉之科至貞祐時又賜救命章服與進士同例其科特重載於諸史紀志者甚詳亦未及徵引不足以云暇備也

右政書類軍政之屬二部五卷皆附存目

永徽法經三十卷

永樂大典本

次定西軍

史部 政書類存目二

三四

元鄭汝翼撰汝翼字鵬舉河南人喬從善跋謂其
束髮讀書學刑名家罔不涉獵得法外意中金朝
律科選官刑部檢法迨壬辰革命徙居順德州節
度趙公識其有平反譽擢詳議中書省尋舉授大
理丞後以奉直大夫左三部郎中致仕是書作於
中統癸亥意主發明唐律故名之曰永徽法經自
序稱唐永徽因隋參定爲十二章三十卷其法詳
備金朝嘉尙制科皇統大定權定大略未成章目
道陵敕設詳定校定兩所自明昌至泰和以隋唐

遼宋遺文參定篇目卷帙全依唐制其閒度時增
損者十有一二遼宋皇統大定文籍更革無存永
徽泰和遺文足徵因閱此書以隨款異同者分析
編類庶便於觀覽其目仍用十二章之舊每篇目
下有議自李悝以後同異分合前後之次各析其
沿革源流其書則列唐律於前而附金律於後或
有或無或同或異或增或減俱詳爲之註頗爲精
密文淵閣書目載此書一部五冊不著卷數永樂
大典所載者併爲四卷今從之著錄

至正條格二十三卷 永樂大典本

元順帝時官撰凡分目二十七曰祭祀曰戶令曰學令曰選舉曰宮衛曰軍防曰儀制曰衣服曰公式曰祿令曰倉庫曰廩牧曰田令曰賦役曰關市曰捕亡曰賞令曰醫藥曰假甯曰獄官曰雜令曰僧道曰營繕曰河防曰服制曰站赤曰權貨案元史刑法志載元初平宋簡除繁苛始定新律至元二十一年中書省咨各衙門將元降聖旨條律頒之有司號曰至元新格仁宗時又以格例條畫類

集成書號曰風憲宏綱英宗時復加損益書成號曰大元通制其書之大綱有三一曰詔制二曰條格三曰斷制自仁宗以後率遵用之而不及此書據歐陽元序則此書乃順帝至元四年中書省言大元通制纂集於延祐乙卯頒行於至治之癸亥距今二十餘年朝廷續降詔條法司續議格例簡牘滋繁因革靡常前後衡決有司無所質正往復稽畱吏或舞文請擇老成耆舊文學法理之臣重新刪定上乃敕中書專官典治其事遴選樞府憲

臺大宗正翰林集賢等官編閱新舊條格參酌增損書成爲制詔百有五十條格千有七百斷例千五十有九至正五年書成丞相阿魯圖等入奏請賜名曰至正條格其編纂始末釐然可考元史遺之亦疎漏之一證矣原本卷數不可考今載於永樂大典者凡二十三卷

金玉新書二十七卷

永樂大典本

不著撰人名氏蓋元時坊本也其書凡大綱三十一門一曰民庶二曰商旅三曰僧道四曰官制五

曰州縣六曰監司七曰皇族八曰遣使九曰職任十曰薦舉十一曰選試十二曰推鞠十三曰公吏十四曰軍防十五曰督捕十六曰倉庫十七曰場務十八曰綱運十九曰工役二十曰功賞二十一曰推賞二十二曰職田二十三曰朝享二十四曰恩封二十五曰儀制二十六曰禮制二十七曰給賜二十八曰文書二十九曰請給三十曰急遞三十一曰貢獻每門皆以二字爲題中又分子目皆以六字爲題繁雜贅亂殊不足觀其曰金玉新書

者殆取金科玉律之意立名亦未雅馴也

官民準用七卷

永樂大典本

不著撰人名氏前有徐天麟序曰元不尙苛細故不用太和舊例然隨事立法前後所降格例文墨之吏不能盡睹及蒙省臺降令內外衙門編類置簿檢舉適有好事君子出一編書示余曰官民準用云云則是書乃畱心法律者鈔集案牘而爲之非官撰也前列詔敕中分三十二目一日官制二日吏員三日公牘四日禮儀五日學校六日僧道

七日戶役八日田產九日婚娶十日良賤十一日債負十二日俸給十三日錢糧十四日課程十五日倉庫十六日權禁十七日鋪驛十八日軍兵十九日臺察二十日訴訟二十一日警捕二十二日斷獄二十三日禁約二十四日雜犯二十五日盜賊二十六日毆殺二十七日賊焚二十八日姦汙二十九日詐僞三十日拾遺三十一日工作三十二日匠役附以唐律諸圖蓋元初罷科舉而用掾吏故官制之下卽次以吏員又其時三教竝重故

學校之後卽次以僧道也此書明文淵閣書目作四冊不言幾卷今見於永樂大典者凡七卷已合併舊帙非其原數矣

明律三十卷

永樂大典本

明太祖時敕修初太祖平武昌卽議律令吳元年命左丞相李善長爲律令總裁官楊憲陶安等爲議律官諭之曰法貴簡當使人易曉若條緒繁多或一事兩端可輕可重吏得因緣爲姦非法意也遂御西樓召諸臣賜坐從容講論律意書成又恐

小民不能周知命大理卿周禎等自禮樂制度錢糧選法之外凡民間所行事宜類聚成編訓釋其義頒之郡縣名曰律令直解洪武元年又命儒臣四人同刑官講唐律日進二十條六年夏刊律令憲綱頒之諸司然皆隨宜草創未及詳備此書乃六年之冬詔刑部尙書劉惟謙詳定凡近代比例之繁姦吏可資爲出入者咸痛革之每一篇成繕書上奏揭於西廡之壁親爲裁定明年二月書成篇目一準於唐採用已頒舊律三十六條因事制

律三十一條掇唐律以補遺者又一百二十二條
合六百有六條然明代斷獄不甚遵用故其書亦
罕傳本此猶永樂大典所載明初之舊本也

右政書類法令之屬五部一百十七卷皆附存目

元內府宮殿制作一卷

永樂大典本

不著撰人名氏所記元代門廊宮殿制作甚詳而
其辭鄙俚冗贅不類文士之所為疑當時營繕曹
司私相傳授之本也

造甄圖說一卷

浙江巡撫採進本

明張問之撰問之慶雲人嘉靖癸未進士官至工
部郎中自明永樂中始造甄於蘇州責其役於長
洲窯戶六十三家甄長二尺二寸徑一尺七寸其
土必取城東北陸墓所產乾黃作金銀色者掘而
運運而晒晒而椎椎而舂舂而磨磨而篩凡七轉
而後得土復澄以三級之池濾以三重之羅築地
以晾之布瓦以晞之勒以鐵弦踏以人足凡六轉
而後成泥揉以手承以托版研以石輪椎以木掌
避風避日置之陰室而日日輕築之閱八月而後

成坯其入窰也防驟火激烈先以糠草薰一月乃以片柴燒一月又以棵柴燒一月又以松枝柴燒四十日凡百三十日而後甯水出窰或三五而選一或數十而選一必面背四旁色盡純白無燥紋無墜角叩之聲震而清者乃爲人格其費不貲嘉靖中營建宮殿問之往督其役凡需甄五萬而造至三年有餘乃成窰戶有不勝其累而自殺者乃以採鍊燒造之艱每事繪圖貼說進之於朝冀以感悟亦鄭俠繪流民意也其書成於嘉靖甲午而

明之弊政已至於此蓋其法度陵夷民生塗炭不待至萬歷之末矣

西槎彙草一卷

浙江范懋柱家天一閣藏本

明龔輝撰輝有全陝政要略已著錄嘉靖時營仁壽宮輝以營繕司主事奉使督木四川得大木五千餘株版枋如之部劄欲再倍其數公私俱困民情洶洶輝乃繪山川險惡轉運艱苦等狀爲十五圖前後各作圖說具奏竟得旨停止後列劄子三篇又附載詩文數首其曰西槎彙草者輝嘗使浙

東故此名西槎以別之也其圖說劄子皆剴切酸楚使人感動與張問之造瓢圖說相等自當以採木圖說為名不當更贅附詩文名以彙草其編次殊無體例且詩文寥寥數首又皆不工益為無謂矣今仍著錄政書中從所重也

南船紀四卷

江蘇巡撫採進本

明沈啓撰啓有吳江水利考已著錄是編乃啓嘉靖中以南工部營繕司主事監督龍江提舉司時所撰案明史兵志太祖於新江口設船四百永樂

初又命鎮江各府衛造海風船皆江船也又職官志所載各船有黃船遮洋船淺船馬船風快船備倭戰船諸名內惟遮洋備倭二種為海中所用故啓不之及其餘各船圖形工料數目暨因革典司諸例無不詳悉備載

國朝江甯府設同知一員專管督造戰船今昔異宜其制已不盡合然參考損益未始非船政之權輿也

水部備考十卷

浙江巡撫採進本

水部備考十卷

史部 政書類存目一

明周夢陽撰夢陽字啟明南漳人萬歷甲戌進士官至工部都水司郎中以工曹職掌冗雜又前後多所更革難於稽考因檢校案牘以類編次各立綱目分爲職官河渠橋道舟車織造器用權量徵輸供億叢事凡十考未附吏典承行事件書成於萬歷丁亥

浮梁陶政志一卷

編修程晉芳家藏本

國朝吳允嘉撰允嘉有吳越順存集已著錄是書皆記江西景德鎮官窯始末凡七條疎略殊甚後爲

景德舊事十四條而吳十九一條重出又時代顛舛容齋隨筆一條以宋事列明後池北偶談一條以

國朝事列宋前殊無條理

右政書類考工之屬六部十八卷皆附存目

欽定四庫全書總目卷八十四

漢軍樊封初校
南海潘繼李覆校

次定四庫全書總目卷八十四

史部 政書類存目二

三三

欽定四庫全書

欽定四庫全書

欽定四庫全書

欽定四庫全書

欽定四庫全書

欽定四庫全書

欽定四庫全書

四七